

03 March 2025

समे .18:15 Hrs

<><><><><><>

Headlines

- प्रधानमंत्री नरेंद्र मोदी होरें राष्ट्रीय वन्यजीव बोर्ड दी 7मी बैठक दी प्रधानता कीती।
- जम्मू-कश्मीर विधानसभा दा बजट इजलास शुरू, उपराज्यपाल मनोज सिन्हा होरें आखेआ जे सरकार जम्मू-कश्मीर दा राज्य दा दर्जा बहाल करने ते पंचैती चुनाऽ कराने लेई बचनबद्ध ऐ।
- विधानसभा दे स्पीकर अब्दुल रहीम राथर होरें बजट इजलास लेई अध्यक्षें दे पैनल लेई मुबारक गुल, मोहम्मद, यूसुफ तारीगामी ते सुरजीत सिंह सलाथिया हुंदे नाएं दा ऐलान कीता।
- बजट इजलास दे पैहले ध्याड़े अज्ज पिछले इजलास दे बाद पूरे होए दे साबका सांसदें ते विधायकें गी शरधांजलि भेंट कीती गई।
- खेलो इंडिया स्यालू खेड्डें दे 5में संस्करण दा दुआ गेड़ 9 थमां 12 मार्च तोड़ी गुलमर्ग च आयोजित कीता जाग।

<><><><><><>

PM-Wildlife

प्रधानमंत्री नरेन्द्र मोदी होरें जंगली जीएं-जैतुएं सरबंधी कुल संसारी ध्याड़े यानि विश्व वन्यजीव संरक्षण दिवस पर गुजरात दे जूनागढ़ जिले दे सासन गिर च राष्ट्रीय वन्यजीव बोर्ड दी 7मीं बैठक दी प्रधानता कीती। बैठक च केन्द्री पर्यावरण मंत्री भूपेन्द्र यादव हुंदे सने बक्ख-बक्ख राज्यें दे सदस्यें, इस खेत्तर च कम्म करने आहले गैर सरकारी संगठनं दे प्रतिनिधिएं, मुख्क वन्यजीव वार्डन ते सचिवें बी हिस्सा लैता। बोर्ड दी बैठक च वन्यजीव संरक्षण ते प्रबंधन कन्नै सरबन्धत बक्ख-बक्ख मुद्दें उप्पर चर्चा कीती गई। आकाशवाणी दे संवाददाता दी रिपोर्ट मूजब, इस बैठक दरान प्रधानमंत्री होरें जूनागढ़ च वन्यजीवें लेई नेशनल रेफरल सेंटर दा वर्चुअल ढंगै'नै नीहू पत्थर बी रक्खेआ। प्रधानमंत्री होरें एशियाई बब्बर शेरें दी आबादी आहले 16में अनुमान ते कोयंबटूर च मनुक्खें ते जंगली जनौरें बश्कार संघर्ष गी रोकने मतल्लक इक उत्कृष्टता केन्द्र दा बी उद्घाटन कीता। बैठक शा पैहले श्री मोदी होरें गिर नेशनल पार्क च जंगली सफारी कीती ते सिंह सदर कैपस च रूक्ख-बूहटे लाने दे अभियान च बी हिस्सा लैता।

<><><><><><>

LG-Address

लेफ्टिनेंट गवर्नर मनोज सिन्हा होरें आखेआ ऐ जे सरकार जम्मू-कश्मीर दा राज्य दर्जा बहाल करने दी मंग गी पूरा करने लेई वचनं बज्झी दी ऐ। आकाशवाणी जम्मू दे संवाददाता दी रिपोर्ट मूजब, एलजी होरें एहू गल्ल अज्ज जम्मू च विधानसभा दे बजट इजलास दे पैहले ध्याड़े अपने उद्घाटन भाषण च आखी। उ'नें गलाया जे सरकार, इस

मकसद गी हासल करने लेई बक्ख-बक्ख सरबन्धत धड़ें कन्नै गल्लबात बरोबर जारी रक्खोग। उ'नें इब्बी आखेआ जे सरकार, कश्मीरी पंडतें दी घाटी वापस ते उत्थे उ'दे लेई साज़गार म्हौल कायम करने लेई बी वचनबद्ध ऐ। श्री सिन्हा होरें आखेआ जे सरकार पंचैतें ते शैही मुकामी निकाएं दे चुनांऽ बेल्ले सिर करोआइयै इ'नें इदारे गी बाअखितयार बनाने लेई बी वचनें बज्झी दी ऐ।

<><><><><><>

Speaker-Chairman

जम्मू-कश्मीर विधानसभा दे स्पीकर अब्दुल रहीम राथर होरें बजट इजलास लेई अध्यक्षें दे पैनल लेई सदस्यें दे नाएं दी घोषणा कीती। इन्दे च ईदगाह थमां विधायक मुबारक गुल, कुलगाम थमां विधायक मोहम्मद युसुफ तारीगामी ते साम्बा थमां विधायक सुरजीत सिंह सलाथिया शामिल न। एहदे शा पैहले स्पीकर होरें एल.जी हुंदे अभिभाषण गी चर्चा लेई सदन पटल पर रक्खेआ।

<><><><><><>

LA-Obituaries

अज्जै थमां शुरु होए दे जम्मू-कश्मीर विधानसभा दे बजट इजलास दरान अज्ज साबका प्रधानमंत्री डाक्टर मनमोहन सिंह हुंदे सने ओकडे साबका सांसदें ते विधायकें गी बी श्रद्धांजलि अर्पित कीती गई जि'दा पिच्छले इजलास दे बाद आहले समें दरान काल होआ ऐ। इस मौके उप्पर देसै दी अर्थबवस्था गी आकार देने च डाक्टर मनमोहन सिंह हुंदे जोगदान गी चेत्ता कीता गेआ। स्पीकर अब्दुल रहीम राथर होरें आखेआ जे डाक्टर मनमोहन सिंह हुंदे देसै लेई दित्ते गेदे जोगदान गी सदा चेत्ता रक्खेआ जाहग। स्पीकर होरें साबका मंत्री सैय्यद गुलाम हुसैन गिलानी, साबका सांसद शमशेर सिंह मन्हास, साबका विधायकें गुलाम हस्सन परें ते चौधरी पिआरा सिंह होरें' गी बी श्रद्धांजलि अर्पित कीती। विधायक मुबारक गुल, शाम लाल शर्मा, डाक्टर नरिंदर सिंह, गुलाम अहमद मीर ते होरनें बी साबका प्रधानमंत्री डाक्टर मनमोहन सिंह ते होरनें साबका सांसदें ते विधायकें गी श्रद्धांजलि दिती। सदन च इ'नें सुरगवासी नेताएं दे सम्मान च द'ऊं मिंटें दा मौन बी रक्खेआ गेआ।

<><><><><><>

Reasi-SHG

ग्रामीण आर्थिक सशक्तिकरण दी दिशा च इक महत्वपूर्ण गैहू दे तौरा पर रियासी दे कंजली ग्रांऽ च इक आप सहायता समूह नै केंद्र आसेआ प्रायोजित डेयरी विकास परियोजना तैहत दुध कन्नै बनने आहले बक्ख-बक्ख उत्पादें जियां जे खोवा वगैरा गी बनाना शुरू कीता ऐ। इस पैहलकदमी राहें खित्ते च डेयरी सैक्टर गी मजबूत करने दे अलावा महिलां उद्यमियें गी सशक्त करने दा बी इक बेहतरीन मौका ऐ। सरकार दी मदाद ते मकामी अधिकारियें दे मार्गदर्शन कन्नै इस स्कीम दी शुरूआत कीती गई ऐ जेदे च आप सहायता समूहें दियां महिलां सदस्य बदी चढियै हिस्सा लै रदियां न तां जे ओहू आर्थिक तौरा पर सशक्त बनी सकन ते कन्नै अपने परोआरें लेई आर्थिक स्थिरता यकीनी बनान। आकाशवाणी जम्मू कन्नै गल्ल करदे होई कंजली दे साबका सरपंच सुखदेव सिंह होरें आखेआ।

<><><><><><>

Watershed-Jammu

जमीनें दे टिकाऊ प्रबंधन ते पानी दी सांभ.संभाल गी बढ़ावा देने दी इक बड़ी पैहलकदमी दे तैहत जम्मू दे भलवाल ब्लाक आसेआ प्रधानमंत्री कृषि सिंचाई योजना दे दुए चरण हेठ राश्ट्रव्यापी वाटरशैड जात्तरा दे इक हिस्से दे तौर उप्पर महत्वपूर्ण कार्यक्रम दी मेजबानी कीती गई। जम्मू.कश्मीर च 5 लक्ख शा मते लोकें तोहड़ी पुज्ज बनाई चुके दे इस अभियान दा मकसद वाटरशैड सरबन्धी असरदार विकास रणनीति दे राहें मुकामी समुदायें गी सशक्त बनाने पर ध्यान केन्द्रित करना ऐ। इस कार्यक्रम दे तैहत केई सारे महत्वपूर्ण वाटरशैड कार्यक्रमें दा ई.उद्घाटन कीता गेआ ते राई.बाई उत्पादन च सुधार ते लम्मी मुद्धत आहली ग्रामीण आजीविका जकीनी बनाने दे महत्व पर लोऽ पाई गई।

<><><><><><>

Winter-Games

खेलो इंडिया विंटर गेम्स दे 5में संस्करण दे दुए चरण दी मेजाबनी करने लेई जम्मू-कश्मीर प्रशासन ते जम्मू-कश्मीर खेडूए परिषद पूरी चाल्ली तैयार ऐ। इनें स्यालू खेडू दे आयोजन कश्मीर घाटी दे गुलमर्ग टूरिस्ट रिजार्ट च 9 थमां लेइयै 12 मार्च तगर कीता जाग। एहदे शा पैहले एहू खेडूां 22 फरवरी थमां शुरू होनियां हियां पर इलाके च पर्याप्त मात्रा च बर्फबारी नेई होने दे कारण इनेंगी अगड़ा पाई दित्ता गेदा हा। हून एहू खेडूां 9 मार्च थमां गुलमर्ग च शुरू होआ'रदियां न। इन्दे च Alpine Sking, Nordic Sking, Ski Mountaneering ते Snow boarding जनेही खेडूएं शामिल न। इनें खेडू दे पैहले चरण दी मेजबानी लेह आसेआ 23 जनवरी थमां 27 जनवरी तगर कीती गेदी ही जिंदे च आईस हॉकी ते स्केटिंग जनेहू खेडू शामिल हे।

<><><><><><>

Properties Attached

जम्मू कश्मीर पुलस आस्सेआ कल पुंछ जिले च त्रै आतंकवादिएं दी 14 कनाल 8 मरले दी जमीन गी अटैच कीता गेआ। एहदी कीमत 28 लक्ख रपे थमां बद्ध दस्सी जा'रदी ऐ। एहू जमीन कब्जा रेखा कन्नै लगदे कासबा ते किरनी ग्रां दे मकामी आतंकवादिएं दी ऐ जेहडे पाकिस्तान दे नजैज कबजे आले कश्मीर नस्सी गेदे न। एहू कारवाई बन्ने पारा थमां प्रायोजित आतंकवाद खत्म करने ते आतंकवादिएं गी थहोने आली मदद सरबन्धी पूरे पराते सरिस्ते गी नश्ट करने तैहत कीती गई ऐ। प्रशासन आस्सेआ लगातार जतन कीते जा'रदे न, खित्ते च आतंकवाद दी चुनौतिएं गी घट्ट करने ते आतंकवादिएं गी थहोने आली माली इमदाद गी खत्म करने आस्तै।

<><><><><><>

Udhampur-Farmers

तकरीबन 5एं म्हीनें थमां चलै करदे सोक्के जनेय हालात दे मगरा जंदे किश दिनें दरान होई दिएं बरखें करी उधमपुर जिले च करसान मते खुश न कीजे उं'दे आसेआ राई गेदी फसलें खासकरियै स्ट्राबेरी लेई उ'नेंगी बरखा दी बड़ी मती लोड़ ही। इस पर खुशी जाहू करदे होई इ'नें करसानें मेद बुज्झी ऐ जे बरखें करी उंदी फसलें च नमीं जान औग ते उनें'गी बेहतर ते मय्यारी झाड़ हासल होग। इस बारै होर मती जानकारी देआ करदे न साहू जिला संवाददाता अचिन दुबे।

Weather

जम्मू-कश्मीर दे कई सारे इलाकें च अज्ज हल्की थमां दरम्याने दर्जे दी बरखा ते बर्फबारी होई। मैदानी इलाकें च बरखा जिस्सलै के उप्परली धारें च बर्फबारी कननै आम जन-जीवन प्रभावित होआ ऐ। उआं दपैहरी मगरा खास करियै मौसम साफ होई गेआ। विभाग नै भविष्यवाणी कीती ऐ जे कल 4 मार्च थमां लेइयै 9 मार्च तोहड़ी मौसम आमतौरा पर खुशक रौहग ते ओहदे परैन्त 10 मार्च थमां लेइयै 13 मार्च तोहड़ी फही बरखा ते बर्फबारी दे असार न। जम्मू-श्रीनगर राश्ट्री जरनैली सिड़क फिलहाल गड्डिएं दी आओजाई लेई खुल्ली दी ऐ ते हौली मोटर गड्डिएं गी दौनें बक्खी दा आओजाई दी खुल्ल दिती गेदी ऐ। सिड़कै दी स्थिति दा जायजा लैने परैन्त गै भारी मोटर गड्डिएं गी नवयुग सुरंग थमां जम्मू बक्खी औने दी इजाजत दिती जाह्ग। लोकें गी एहू गुजारिश बी कीती गेई ऐ जे ओह पूरे अनुशासन कन्नै अपनी अपनी लेन च गै गड्डी चलान ते दिनै बेल्ले गै सफर करन।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रेजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंध्यत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001 उप्पर उप्पर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>